

## 12. gr.

Sveinsprófsnefnd getur samið við tiltekna aðila um að annast framkvæmd sveinsprófanna. Í samningi skal m.a. koma fram að umsýsluaðili prófanna sjái um framkvæmd þeirra, auglýsi þau og skrái próftaka til prófs og útvegi sveinsprófsnefnd vinnuáðstöðu. Leita skal samþykkis menntamálaráðherra fyrir samningnum.

## 13. gr.

Sveinspróf skal halda eigi sjaldnar en einu sinni á ári í framhaldi af brautskráningu úr iðnmenntaskólum enda sé nægjanleg þátttaka próftaka fyrir hendi að mati menntamálaráðuneytisins. Sveinspróf skulu fara fram á viðurkenndum prófstað. Fari sveinspróf í iðngrein fram á fleiri en einum stað á landinu samtímis skal prófið vera samræmt eftir því sem við verður komið.

Umsóknir um sveinspróf skulu sendast menntamálaráðuneytinu sé annað ekki tiltekið í auglýsingu.

Umsóknarfrestur um sveinspróf skal vera einn mánuður frá birtingu auglýsingar.

## 14. gr.

Reglugerð þessi er sett samkvæmt heimild í 24. gr. laga nr. 80/1996 um framhaldsskóla og öðlast þegar gildi.

*Menntamálaráðuneytinu, 17. apríl 1997.*

**Björn Bjarnason.**

*Stefán Baldursson.*

## REGLUGERÐ

### um fullorðinsfræðslu og endurmenntun.

## 1. gr.

Reglugerð þessi gildir um nám í öldungaeildum framhaldsskóla, um endurmenntunarnámskeið á vegum framhaldsskóla og starfsemi fullorðinsfræðslumiðstöðva.

## 2. gr.

Framhaldsskólum er heimilt með samþykki menntamálaráðherra að bjóða upp á nám í öldungaeildum, þ.e. almenna og sérhæfða fræðslu fyrir fullorðna sem hentar ekki að sækja reglulega kennslu í dagskóla. Nám í öldungaeildum er jafngilt námi á einstökum námsleiðum framhaldsskólans.

Framhaldsskóli skal sækja um heimild til menntamálaráðherra sbr. 1. mgr. 2. greinar. Í umsókn skal gera grein fyrir væntanlegri starfsemi, námsframboði og umfangi. Þegar heimild hefur verið veitt fyrir öldungaeildarnámi skulu frekari upplýsingar um starfsemina koma fram árlega í starfs- og fjárhagsáætlun skólans.

## 3. gr.

Nám í öldungaeildum skal vera jafngilt námi á námsleiðum dagskóla, en skipulag og kennsluhættir taki mið af því að um fullorðna nemendur er að ræða. Í náminu skal gera sömu kunnáttu- og færnikröfur og til nemenda í dagskóla. Námi skal ljúka með sambærilegum prófum og í dagskóla.

## 4. gr.

Framhaldsskóli getur boðið fram allar námsbrautir í öldungadeild sem eru skilgreindar í aðalnámskrá eftir því sem nemendafjöldi, fjármagn og aðstæður leyfa. Skipulag náms og kennslu fer eftir ákvæðum í aðalnámskrá.

## 5. gr.

Nemendur sem stunda nám í öldungadeild skulu að jafnaði vera orðnir 18 ára þegar þeir hefja námið.

Það er á valdi viðkomandi skólameistara að meta hvort yngri nemendur, sem eru innritaðir í dagskóla, geti fengið að stunda nám í öldungadeild ef sérstakar aðstæður eru fyrir hendi svo sem

- a) að námsáfangi sé ekki kenndur í dagskóla,
- b) að nemandi eigi aðeins eftir að taka fáa námsáfanga til að ljúka námi og geti vegna stundaskrár ekki sótt námið í dagskóla,
- c) að persónulegar aðstæður, svo sem sjúkleiki eða félagslegar aðstæður, geri nemanda erfitt um vik að sækja dagskóla.

## 6. gr.

Skóla er heimilt að meta fyrra nám til styttingar á öldungadeildarnámi skv. viðurkenndum skírteinum og ákvæðum í aðalnámskrá. Eins skulu nemendur geta fengið kunnáttu sína metna með stöðuprófi eftir því sem aðstæður leyfa enda greiði þeir kostnað sem prófinu fylgir.

## 7. gr.

Um námsmat í öldungadeildarnámi gilda sömu reglur og um námsmat í dagskóla.

## 8. gr.

Fyrir kennslu í öldungadeildum greiða nemendur gjald sem nemur sem næst þriðjungi kennslulauna vegna þeirrar kennslu.

## 9. gr.

Heimilt er framhaldsskóla að starfrækja endurmenntunarnámskeið eða annars konar námskeið. Starfræksla slíks námskeiðahalds getur verið á vegum skólans einvörðungu eða byggst á formlegu samkomulagi við faggreina- eða stéttarfélög, atvinnurekendur eða aðra hagsmuna- eða áhugahópa.

Þátttökugjöld nemenda og/eða framlög samstarfsaðila skólans samkvæmt samkomulagi skulu standa að fullu undir kostnaði. Halda skal sérgreindum kostnaði vegna námskeiðahaldsins aðgreindum frá öðrum rekstri skólans og skal skólinn ekki veita nein framlög til þess af rekstrarfé sínu.

Framhaldsskóla ber fyrirfram að leita eftir samþykki menntamálaráðherra fyrir námskeiðahaldi skv. 1. mgr. og kynna um leið samkomulagið við samstarfsaðila skólans, ef um slíkt er að ræða, þar sem greiðsla kostnaðar vegna námskeiðahaldsins er tryggð.

Um endurskoðun reikninga vegna þessarar starfsemi fer með sama hætti og um endurskoðun reikninga skólans.

## 10. gr.

Framhaldsskóla er heimilt, að fengnu samþykki menntamálaráðherra, að stofna til samvinnu við sveitarfélög, faggreinafélög, stéttarfélög, atvinnurekendur eða aðra hagsmuna- eða áhugahópa um rekstur sjálfstæðrar miðstöðvar, fullorðinsfræðslumiðstöðvar, sem ætlað er að skipuleggja og reka fræðslu- og kynningarstarf fyrir fullorðna.

Um starfsemina skal gera samstarfssamning þar sem gerð er grein fyrir hlut skólans, helstu stefnumálum og rekstrargrundvöllur tryggður en starfsemi þessi skal hafa sjálfstæðan fjárhag og bókhald. Í samstarfssamningi skal kveðið á um hvernig endurskoðun reikninga skuli hagað.

11. gr.

Reglugerð þessi er sett samkvæmt 33. og 35. gr. sbr. 34. gr. laga nr. 80/1996 um framhaldsskóla og öðlast þegar gildi.

*Menntamálaráðuneytinu, 17. apríl 1997.*

**Björn Bjarnason.**

*Stefán Baldursson.*

Nr. 280

17. apríl 1997

## REGLUGERÐ

### um námssamninga og starfsþjálfun.

1. gr.

Reglugerð þessi fjallar um gerð námssamninga og starfsþjálfun á vinnustað á vegum skóla eða annarra aðila í löggiltum iðngreinum.

2. gr.

Um starfsnám í atvinnulífinu skal gera námssamning milli iðnfyrirtækis eða meistara og iðnnema í samræmi við 32. gr. laga um framhaldsskóla og ákvæði reglugerðar þessarar.

Iðnmenntaskólar fylgjast með að samningar um starfsþjálfun í atvinnulífinu séu gerðir fyrir hönd iðnnema á verknámsbrautum.

3. gr.

Ekki má taka yngri einstakling en 16 ára á samning sbr. 54. gr. laga nr. 58/1992 sbr. 10. kafla l. nr. 46/1980. Í iðngreinum þar sem vinnuhættir, vinnuskilyrði, vinnutími eða önnur atriði gera slíkt nauðsynlegt getur menntamálaráðherra áskilið hærra aldursmark eða ef önnur lög kveða svo á um. Dagvinnutími iðnnema skal vera hinn sami og sveina í hlutaðeigandi iðngrein samkvæmt kjarasamningi.

Menntamálaráðherra er heimilt að gera próf af verknámsbraut að skilyrði fyrir því að iðnnámssamningur sé gerður.

4. gr.

Fulltrúi menntamálaráðherra staðfestir námssamning. Leita skal staðfestingar fulltrúa menntamálaráðherra á námssamningi innan mánaðar frá undirskrift. Afrit af námssamningi skal sent menntamálaráðuneytinu til skráningar.

5. gr.

Menntamálaráðuneytið leggur til eyðublöð undir námssamninginn og ræður gerð hans. Í námssamning skal skrá upphaf náms, áætluð námslok svo og skóla þar sem nám er stundað. Samningurinn er gerður í fjórriti og skal hvor samningsaðili halda sínu eintaki, fulltrúi menntamálaráðherra einu eintaki og skólinn einu. Honum skal fylgja námsáætlun nemandans staðfest af skóla þar sem nám er stundað.

6. gr.

Fyrstu 3 mánuðir námstíma samkvæmt námssamningi skoðast sem reynslutími. Hvenær sem er á reynslutímanum getur hvor samningsaðili um sig slitið námssamningi án þess að tilgreina ástæður.